

SKOONHEIDSWEDSTRYDE

Prof. Paul de Bruyn¹

[Bron: *Bewaar jou goeie pand – vraagstukke besien vanuit Gereformeerde standpunt* (Potchefstroom: Pro Rege-Pers, 1964), bl.125-127. Voetnotas is bygevoeg – Slabbert Le Cornu.]

Skoonheidswedstryde is dwarsoor die wêreld en ook in ons eie land aan die orde van die dag. Jaarliks kies elke land wat wil meedoen 'n „mej. Suid-Afrika”, „mej. Finland”, „mej. Engeland”, ens.² en uit hulle geledere word dan weer die „mej. Wêreld” gekies, wat dan die mooiste in die wêreld sou wees—altans van die wat meegedoen het. In ons land word in verskillende dorpe en stede skoonheidswedstryde gehou om „die mooiste” in hulle geledere aan te wys. Selfs word vir verskeie vrugte- en groentesoorte en ander produkte skoonheidswedstryde uitgeskryf om byvoorbeeld 'n „mej. Groen mielie”, ens. te kies. Sekere tydskrifte laat in hierdie verband ook nie op hulle wag nie. Sommige universiteite en kolleges kies jool koninginne.

Wat is nou die wesenstrekke van skoonheidswedstryde ?

Dit is in kort die volgende: „Uiterlike, meetbare kenmerke van die vroulike liggaam, wat die mens geërf of ontvang het en waaraan sy nie kan verander nie, word beoordeel. En dit gebeur na tentoonstelling in minimum kleredrag, waarby die liggaamsmate en vorm-skoonheid die deurslag gee, sonder inspanning van die kant van die deelnemer ster.”ⁱ

Die doeleindes van hierdie kompetisies is uiteenlopend. Soms moet dit dien as advertensie. Soms moet dit help met die insameling van fondse. Soms word gepoog om daarmee die verkoop van tydskrifte te vermeerder. Soms het dit ook iets te doen met modeparades.

Die skoonheidskompetisies moet nou dien om op hierdie bepaalde sake die aandag te vestig. Die meeste besighede het al uitgevind wat die waarde van die foto van 'n half-naakte meisie by 'n advertensie is. As die half naakte dame nou nie net deur middel van 'n foto nie, maar persoonlik teenwoordig is, is die advertensiewaarde des te groter - wat staan nog as daar 'n hele aantal halfnaakte skones is uit wie die mooiste gekies moet word. So word nie gekroom om die mens doelbewus seksueel te prikkel om besigheid te bevorder nie. En die organiseerders van sulke wedstryde weet maar al te goed hoedanig die sondaar mens van sodanige prikkeling hou sodat hy terdeë ag gee op wat hulle besig is om te doen.

Hierin kan reeds die sonde van sulke skoonheidswedstryde gesien word. Christus sê dat elkeen wat na 'n vrou kyk om haar te begeer, reeds in sy hart egbreuk gepleeg het (Matt. 5:28). En hoe kan 'n mens vry bly van hierdie sonde in sulke wedstryde waar mooi geboude meisies met 'n minimum klere aan voor die toeskouers verby masjeer? Laat ons onself nie bedrieg nie. Trouens; hier word die kyk na die vrou om haar te begeer vir die belangstellendes spesiaal georganiseer - maak nie saak wat die motiewe agter so 'n organisasie is nie.

Die organiseerders van die kompetisies maak dus dat die toeskouers sondig. Die dames wat daaraan meedoen laat hulleself gebruik om die toeskouers te laat sondig. Die toeskouers gaan terwyl hulle vooraf weet van die sondige prikkeling wat op hulle wag. Almal staan skuldig voor die Here. Hulle sal nie ongestraf bly nie.

Ons verdere beswaar teen hierdie kompetisies is dat diegene wat daaraan meedoen die mooi liggaam wat hulle van God ontvang het, gebruik om roem en eer vir hulle self in te oes.

Dink die jong dame wat so half-naak voor die toeskouers loop en spog met haar liggaam daaraan dat sy hierdie liggaam nie van haarself het nie, maar dat God dit aan haar gegee het om nie haarself nie, maar Hom te verheerlik? Nee, ongetwyfeld vergeet sy dit. Daarom laat sy toe dat in haar die skepsel bo die Skepper verheerlik word.

Oor die mentaliteit wat die dames openbaar wat aan die skoonheidskompetisies meedoen, het wyle ds. G. B. S. Pasch geskryf:ⁱⁱ

„Is jong dames dan koeie? Koeie op 'n tentoonstelling! Is hulle geteel deur hulle ouers wat gebruik gemaak het van doeltreffende teelmetodes om beter en mooier kinders te verwek! Het ouers met mekaar getrou en mekaar uitgesoek met die oog daarop? . . . Selfs 'n koei eer haar baas! Maar die dogter vergeet haar Skepper.”

¹ *Bewaar jou goeie pand – vraagstukke besien vanuit Gereformeerde standpunt* (Potchefstroom: Pro Rege-Pers, 1964), bl.125-127.

² Vandag is daar ook nou vir die manne geslag 'n Mnr-kompetisie.

En van die feit dat uiterlike skoonheid die enigste maatstaf vir beoordeling is, sê hy: „Dat ‘n beeldskone meisie ‘n baie lelike binneste kan hê, daarvoor bekommer die mense hulle minder. Die innerlike skoonheid het in die wêreld te veel aansien the. Daarvan word min verstaan. Die innerlike en sedelike skoonheid verteenwoordig die ware skoonheid. En ware skoonheid is altyd verborge. Ook in die sin verborge dat dit hom nie self aanbied aan tydskrifte en dagblaie om so openbaar te word nie. Die ware skoonheid paradeer nie op mode- en skoonheidsparades the. Dit soek nie bewondering nie. Dit blom in die stilte.”³

Wat leer die Skrif ons?

Uit die Skrif blyk dat ‘n uiterlike vertoning van liggaamlike skoonheid nooit by die ware gelowiges gevind word nie. Wel vind ons dit by die ongelowiges, met name by Ahasveros wat wou hê dat sy vrou, Vasti, haar skoonheid aan die volke en die vorste moes toon (Ester 1:11). Maar die ongelowige Vasti het nog soveel selfrespek gehad dat sy geweier het.⁴

In I Kor. 6:20 skryf die apostel Paulus: „Want julle is duur gekoop. Verheerlik God dan in julle liggaam en julle gees wat aan God behoort.”

Die gelowige behoort ook met sy liggaam aan die Here. Ook sy liggaam is duur gekoop met die kosbare bloed van onse Here Jesus Christus aan die kruis. Daarom mag ons nie ons liggame gebruik vir sondige selfverheerliking nie, maar uit dankbaarheid dat Christus vir die verlossing van ons liggame gely het, moet ons dit gebruik om God te eer.⁵

Daarom skryf Paulus ook: „Ek vermaan julle dan, broeders, by die ontferminge van God, dat julle jul liggame stel as ‘n lewende, heilige en aan God welgevallige offer—dit is julle redelike godsdienst” (Rom 12:1).

En een ding is baie seker: geen jong dame wat haar liggaam wil stel tot ‘n lewende, heilige en aan God welgevallige offer, kan aan ‘n skoonheidswedstryd deelneem, half-naak heen en weer paradeer en ‘n sondige prikkeling by die toeskouers veroorsaak en boonop met haar God-gegewe liggaam haar self wil eer en verheerlik nie.⁶

Aan die gelowige jong dames wat dit oorweeg om aan skoonheidswedstryde deel te neem, vra die Here deur Sy Woord: „Weet julle nie dat julle liggame lede van Christus is nie? . . . Of weet julle nie dat julle liggaam ‘n tempel is van die Heilige Gees wat in julle is, wat julle van God het, en dat julle nie aan juiself behoort nie? (I Kor.6:15, 19).⁷

Met ‘n tempel van die Heilige Gees meedoen aan ‘n sondige skoonheidswedstryd?

Here, bewaar ons!⁸

ⁱ Dr. D. Kempff in „Die Kerkblad” van 15 Augustus 1962, bl. 13.

ⁱⁱ Ds. B. G. S. Pasch: En uit Sy volheid, Potchefstroom, 1960, bl. 155, 156.

³ Vandag se skoonheidskompetisies gaan deesdae ook oor of die dames ‘n ‘mooi persoonlikheid’ het, ‘n ‘waardige ambassadeur’ sal wees. Dit is egter niks anders as ‘n rookskerm vir dit waaroor dit nog steeds gaan nie, naamlik die fisiese skoonheid en aantreklikheid. Bewys: het ‘n mollige oorgewig blondine met ‘n ‘nice persoonlikheid’ al ooit mej. SA of Wêreld geword?

⁴ Iets wat Ester blykbaar nie gehad het nie, toe sy vrywillig aan die koning se ‘skoonheidskompetisie’ deelgeneem het (Est.2:8,9).

⁵ Dit behels dat ons kleredrag ook ons geloof en karakter sal weerspieël, en God eer. Een van die beginsels uit die Skrif vir kleredrag, is dat dit ‘behoorlik’ sal wees ‘met beskeidenheid en ingetoënheid’ (1 Tim.2:9), wat die meeste prikkelende modes en kleredrag vandag nie navolg nie. Die ander beginsel is dat kleredrag ‘onderskeidend’ moet wees, d.w.s. dat dit die Godgegewe onderskeid tussen mans en vrouens sal respekteer (Deut.22:5), iets wat vandag se androgene, feministiese tyd ook ten sterkte verwerp, in beide kleredrag en haarstyle. Sien die boekie van PJ de Bruyn, Die Christen en Kleredrag (Potchefstroom: Pro Rege Pers, 1975), ook aanlyn hier beskikbaar: <http://www.enigstetroos.org/eswordnuut.htm> onder die ‘Lewe’ afdeling.

⁶ Spreuke 5:15-19 wys daarop dat dat die sensuele aspekte van die vrou se liggaam bedoel is vir haar man (of toekomstige man), en nie vir die hele wêreld om te sien nie (v.16, 19).

⁷ Die gereformeerde christen moet ook rekenskap kan gee van Heidelbergse Kategismus, v/a 109, wat handel oor die sewende gebod: “Vraag: Verbied God in hierdie gebod niks meer as net egbreuk en sulke skandes nie? Antwoord: Omdat beide, ons liggaam en siel, ‘n tempel van die Heilige Gees is, wil God dat ons altwee rein en heilig bewaar. Daarom verbied hy alle onkuise dade, gebare, woorde (Ef.5:3,4; 1 Kor.6:18,19), gedagtes, luste (Matt.5:27-28) en alles wat ‘n mens daartoe kan verlei (Ef.5:18; 1 Kor.15:33).”

⁸ Sien die sesde bede van die Onse Vader (Matt.6:13), “En lei ons nie in versoeking nie maar verlos ons van die Bose” (HK v/a 127).